

**Kalaallit Nunatta pigisaannik sillimmasiisarfimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.**  
(Inatsisartunut ilaasortaq Anthon Frederiksen, Partii Naleraq)

### **Akissuteqaat**

(Inuusutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

### **Siullermeerneqarnera**

Naalakkersuisut sinnerlugit siunnersuummut pissanganartumut Inatsisartunut ilaasortaq Anthon Frederiksenip siunnersuutaanut qujassuteqassaanga. Siunnersuuteqartoq Naalakkersuisunit isumaqatigaarput, soqutigigatsigu pisariaqanngitsumik aningaasat Kalaallit Nunaanni iluaqutigineqarlutik atorneqarsinnaagaluit nunamit maanngaanniit anninneqannginnissaat.

Naalakkersuisut taamaammat ataavartumik misissueqqissaarnernik suliaqartarput aningaasat ingerlarngi pillugit, minnerunngitsumik ukiumoortumik aningaasanut inatsimmik isumaqatiginninniarnernut atatillugu Namminersorlutik Oqartussat isertitaat aningaasartuutaallu qitiutinneqartarput.

Siunnersuuteqartup §37 atorlugu apeqqut nr. 17 2015-imeersoq innersuussutigaa, tassani apeqqutigineqarmat Namminersorlutik Oqartussat ukiumoortumik sillimmasiissutinut qanoq annertutigisunik akiliuteqartarnersut, kiisalu Naalakkersuisut isumaliutigisimaneraat inuiaqatigiit aningaasaqarnerannut iluanaarutaasinnaanersoq namminersorlutik oqartussat pigisaannik sillimmasiisarfimmik pilersitsigaanni.

Namminersorlutik oqartussat sillimmasiissutinik pisiniartarnerat ukiut arlallit ingerlanerini ajoqusernerit sillimmasiissutinullu akiliutit aallaavigalugit ajoquseratarsinnaanermut missingersuinikkut ingerlanneqartarput. 1. januaarimit 2017-imit sillimmasiissutinik neqeroortugineqartunit namminersorlutik oqartussat isumaqatigiinniarnikkut 8.5 mio. kr.-nik ukiumoortumik sillimmasiissutinut akiliutaasussanit sipaaruteqarput, tamanna pisinnaasimavoq ajoquseratarsinnaanernut ataasiakkaanut sillimmasiissutinut nammineq

akiliutissaq annertunerusoq akuerineratigut kiisalu immikkoortortat ilaasa imminut sillimmasertutut nuutinnerasigut.

Namminersorlutik oqartussat sillimmasiissutaannut tunngatillugu paasissutissat ersarinnerusut Aningaasanut inatsimmi konto pingaarnermi 70.10.03-mi takuneqarsinnaapput.

Naalakkersuisut marsi 2017-imi Kalaallit Nunaanni sillimmasiisarnernut tunngatilugu inatsilerinermut tunngasumik nalunaarusiamik pissarsivoq.

Naalakkersuisut piareersimapput sillimmasisarfirmik Namminersorlutik Oqartussat pigisaannik pilersitsinermi iluaqutissat akornutaasinnaasullu pillugit nalunaarusiussallutik.

Naalakkersuisut innersuussutigaat siunnersuut Inatsisartuni ataatsimiititaliamut attuumassutilimmut ingerlateqqinneqassasoq, taaneqartutut §37 apeqqummi kiisalu namminersorlutik oqartussat pigisaannik sillimmasiisarfirmik pilersitsisinnaanermut nalunaarusiaq sunik imaqassanersoq nalilersoqqullugu.

Nalunaarusiap UPA2018-imi agguanneqarnissaa naatsorsuutigineqarsinnaavoq.

Taamatut naatsumik oqaaseqarfigalugu siunnersuut akuersissutigineqassasoq inassutigineqarpoq.